

■ GLOSSA

Tsunami

DA CLÀ RIATSCH

Asimmetria drammatica da las reacziuns a mias publicaziuns. Duos onns lavur per leger intginas poesias dad Andri Peer e scriver in commentarin. Nagin resun. Na, in, il plevon Capellanus: Che jau scriviva dad «ainestesias» (aiuto: narcosa!) e citeschia schizunt «Gontale». Sinestesias e Montale èn in scandal, quai è vair. Che Andri Peer saja in nudist – «e nüd resta inavo il poet» (LQ 07-02-2011) – e jau in giardinier academic. Per leger poesias saja da chapir la guerra fraida.

Da l'autra vart: ina glossina svelta, in pau ravgia («pubertara» ma di in criticher) encunter propaganda, numnada «stiro-por» (Attenziun: metafra!). La surpraisa: «Sie haben 143 ungelesene Mails». In tsunami electronic.

Uschia vegn preschenta l'istorgia uffiziala dal rg: in tsunami da consens. Ina proposta modesta per ina grafia da bancnotas e placats. E lura la surpraisa: In'unda dad euforia e buna veglia populara. «Uonda profuonda», sco che di nos poet nudist.

Mes tsunami cuntegna da tut: da bravos cun buttiglia vin enfin «polemica destructiva» e «bes-channa» Al telefon datti anc idioms: «Mo tascha, bajader! Tü faivast zaplign teiscudeschs da scola fingià il



prüm di. Baja vöda! Che mâ sast tü da la scola?»

Uschia èsi. Nagin'idea da pedagogia, alfabetisaziun, immersziun, dubla diglossia, evaluaziuns. Be regurdientschas. Jau hai duvrà tredesch onns scola per empernder a scriver ina mezza frasa valladra e sche Jachen Curdin Arquint na vess betg stuì rir fiss jau sgulà tras la matura da rumantsch.

Rg va be cun agid. «Coscrivna «Es ist»? Cun «i», cun «id» o cun «igel»? Perquai sun jau stut dals uffants rumantschs d'ozendi: dapli linguas sco onns, dublas diglossias, immersziuns ed emersziuns, naginas temas da nagut, be competenzas. Idiom a bucca: excellent, rg en scrit: perfetg. Els san bler, dapli, anc dapli. Jau sun be scuidus.

Dumondas d'instrucziun. Nagin'idea. Be in'esperienza persunala. Rumantsch e sforz na va betg. Naginas schanzas,

gnanc'ils punctins da Bologna na gidan vinavant. Unica pussaivladad: emperuvar da mussar ch'insatge rumantsch sa esser attractiv. Quai emprov jau. En seminaris cun vers elitars plain «anestesias» e discussiuns sur da nudissem, minoranzas e la guerra fraida (secundum Capellanus).

Gida Ti a tschertgar inaviva! Tamazi!» Jau n'hai betg vias, be dubis. Ch'in'instrucziun da rumantsch senza litteratura idiomatica saja povra, ch'in standard decretà na salvia nagut. Ch'il necessari na saja betg pussaivel. Crajast cha'ls vers dad Andri Peer salvan il rumantsch? La barba da Lansel?» Jau na crai nagut e na vi salvar nagut. Jau vi be emperuvar da leger...

Rg è l'unica pussaivladad, la punt sur las chavorgias idiomaticas!» Ina punt u ina suga? Tander ina suga, dir ch'ella saja ina punt e che tuts stoppian passar suravi è forsa in pau... Tgi duess construir la punt sche betg la scola? Ti...» (pleds trids).

Va bain, jau sun in rocamanticher che mitscha dal tsunami e turna en ses «üertin academic» (Capellanus). Là cultiva el timian, salvgia e minoran, pardon, maioran. E sch'in mil stenda ses gnif da müel sur la saiv en survegn el in'«anestesia». Giu pel gnif cun in cudesch da Gontale!